

INFORMACIÓN AOS MEDIOS

O CONSELLO DA XUNTA AUTORIZA A CONTRATACIÓN DAS OBRAS DE AMPLIACIÓN DO COMPLEXO HOSPITALARIO UNIVERSITARIO DE SANTIAGO CUN INVESTIMENTO DE 72,82 M€

- O Goberno galego prevé licitar as obras no mes de setembro para comezalas no primeiro trimestre de 2023
- A actuación permitirá incrementar en case un 30% a superficie do hospital Clínico, coa ampliación de dous bloques de edificios en 36.416 m²
- Prevese a creación dunha nova zona de urxencias pediátricas e a ampliación e reforma das de adultos, ademais da dotación dun novo bloque cirúrxico con 7 novos quirófanos
- Crearase un gran hospital de día no que convivirán as diferentes especialidades médicas que permitirá incrementar a ambulatorización de numerosos tratamentos

Santiago de Compostela, 1 de setembro 2022.- O Consello da Xunta autorizou hoxe a contratación das obras de ampliación do Complexo Hospitalario Universitario de Santiago de Compostela (CHUS), cun orzamento de 72,82 M€.

O Goberno galego prevé licitar no mes de setembro as obras, declaradas como proxecto público de urxencia ou de excepcional interese, de acordo co procedemento regulado na Lei 3/2016.

O obxectivo do Goberno galego é comezar os traballos no primeiro trimestre de 2023. O prazo de execución das obras será de 42 meses.

Con esta actuación ampliarase a superficie actual do Hospital Clínico en case un 30%, incrementando e mellorando as prestacións e servizos aos pacientes da área sanitaria compostelá.

Con esta obra habilitarase unha nova superficie de 36.416 m², dos que 31.126 m² corresponderán ao edificio A, e 5.292 m² ao edificio C, actuando así en dous bloques de edificios do Hospital Clínico.

O edificio A ampliarase cara ao oeste, de forma mimética ao actual edificio hospitalario, para unha máxima integración arquitectónica e funcional. A ampliación disporá dun núcleo de comunicación vertical con 8 ascensores.

En canto á súa distribución, na planta -4 situarase a zona de tratamento de lixos e reservarase unha zona para instalacións, e na -3, reformaranse os laboratorios de inmunoloxía e microbioloxía, así coma o mortuorio.

Ademais, na planta -2 crearase unha nova zona de urxencias pediátricas e reformaranse e ampliaranse as de adultos e no andar número -1 situarase o novo bloque cirúrxico, que

INFORMACIÓN AOS MEDIOS

estarán dotado de 7 novos quirófanos e unha área de espertar. Este número de quirófanos de alta complexidade supón un crecemento dun 50% respecto a dotación existente no Hospital Clínico e permitirá un importante incremento da actividade cirúrxica co seu conseguinte impacto na redución do tempo medio de espera.

No andar 0, situarase unha ampla área de endoscopias, que se distribuirá en endoscopias dixestiva, urolóxica, xinecolóxica e pneumolóxica. A destacar o crecemento da área de endoscopia dixestiva que pasa dun número actual de 4 salas a 10 xunto cunha área específica de adaptación ao medio para os doentes unha vez finalizadas as probas.

Nas plantas 1 a 3 estarán as áreas de hospitalización, dúas por planta, estando a hospitalización hematolóxica nunha das zonas do nivel +2 e sendo de hospitalización médico-cirúrxica os outros cinco ámbitos. A unidade de hematoloxía amplía nun 60% as habitacións individuais necesarias para os novos tratamentos que esta especialidade incorporará nun futuro como son os CAR-T. O incremento destas cinco unidades de hospitalización permitirá que todas as habitacións dos hospitais de Santiago sexan dobres ou individuais.

Na cuberta, que se corresponde co cuarto andar, situarase o heliporto, trasladado desde a súa ubicación actual, afectada pola propia obra de ampliación do hospital Clínico.

No referido ao edificio C, ampliarase cara ao leste desde o nivel -2 ao nivel +2, por tanto, realízase en 5 andares coincidentes cos existentes. Todas as plantas contan cun núcleo de comunicación situado en paralelo ás zonas de espera da fachada sur e con comunicación cos eixos de circulación xeral do edificio externo e interno.

No andar -2 situaranse as áreas de cirurxía plástica e maxilofacial. Tamén se acolle a área de Documentación Clínica e Codificación.

No -1, na fachada Sur sitúase a Unidade de Mama coas consultas e salas de diagnóstico, na zona norte atópase a Escola infantil.

No nivel 0 dispónse un gran Hospital de Día para as diferentes especialidades da área médica, con sala de tratamentos, cubículos, consultas e espazos de apoio, cunha capacidade de 50 postos entre cadeiras de brazos e camas, o que permitirá ampliar a ambulatorización de numerosos tratamentos.

No 1 situarase Pneumoloxía e Alergoloxía, mentres que na 2ª planta estarán as salas polivalentes, e a Unidade da Dor, con sala de técnicas especiais e consulta de anestesia.

En canto á urbanización, manteranse os viarios existentes, se ben é necesaria a súa rectificación co fin de dispoñer do espazo necesario para a execución da obra.

INFORMACIÓN AOS MEDIOS

Ámbito e planta resultante da ampliación:



Alzado da ampliación do bloque A:

